

Tiwei Jut Kewisik

Menmen me tiwei ik

Jut katip mit ne weiwik me God gude 1:1-2
Him me menmen enum mit enun enemitetpin hir nisesim 1:3-13
Maain God kakiwaank mit enun ekerek hir nemitetpin 1:14-16
Jut katip mit hir nenises him eme God werék werék 1:17-23
Jut kitehi God naanmampre mit 1:24-25

¹Hi Jut, hi hiriak menmen me Jisas Krai, hi nikik ke mitik niuk mirak Jems. Hi hewis tiwei ik hesiuwerek ken yi mit nipaa God kehimiteni yi yisesik, hirak han tewenini, Jisas Krai hirak naanmipri. ²Hi hanhan God hirak kakrekyi yaaim, han tewenini, yi eiyu werék werék wisenum.

Mit neweikin sip newet him yaaim me God hir niriak enum mar im

³Nai yinan yaain, hi hanhan hewis tiwei hesiuwerek ke menmen yaaim God hirak kerekyeyem kaktaihis, te hi han kitet hetpi menmen ham hetpi him manp. Yi han tokik eiyu eiyses him yaaim nipaa God kewet haiu mit nisesik, hirak keweteyem miutip. ⁴Hi hewisiyem hentar mit han nisawin menmen hir nisesim mekre han kir nan nau netikewi nekre winak ke yi yewenipi niuk me God yekrerek. Nipaa him me God mit newisim mau tiwei matip mit nar ik God kakiwaanki. Mit nar ik neweikin sip newet God neweikin him mirak yaaim mamkepi, hir niriak enum neriuwerem hir nises menmen enum me neiyewewan. Hir neweikin sip newet Jisas Krai, hirak kerekek naanmiprai hirak kaiu luwe. ⁵Ei epei yertei werék him yaaim me God hir mit nepei netpiyem te hi hanhan pike ekekyi han ki heriuwe him im. Nipaa Mitik luwe kari mit ne weiwik me Isrel neit wit Isip, ketorhis kerik ken. Te maain, hirak kenep mit han hir nisesik au. ⁶Nipaa mit ensel han hir ap nises menmen werék God epei kehimitenorem au. Hir ninaaiwir menmen God

^a 1:1 Mt 13:55 ^b 1:2 2Pi 1:2 ^c 1:3 1Ti 1:18 ^d 1:4 Ga 2:4; 2Pi 2:1 ^e 1:5 2Pi 1:12; Eks 12:51; 1Ko 10:5 ^f 1:6 2Pi 2:4, 9

kehimitenorem metike wit hir newik, te God kewisi naanmipror nekre wit enuk toto nire mit enun nekre winak enuk ke gavman, hir nemerir wi God skelim mit. ⁷Hi hikiak han ki hetpi him me mit ne wit Sodom, wit Gomora netike mit ne wit kike meweikin wit iuwe. Hir enun nire mit enun in ek hir nau netikewi. Hir niwaai netike mit han, miyapir au, te menmen enum im merekiror han. God kewaanki keriuwe si enum mar ke si enum mamu tipmain tipmain enum eik. Menmen im em God kerekyorem hiram mire himin meteiknai mekam maain mamnen mamnep mit enun. ⁸Mit enun nau netikewi nekre winak yi yewenipi God yekrerek, hir niriak enum nar ke mit enun ne wit Sodom. Mit in nentar menmen hir nityak nirem, hir niriak enum me neiyewewan, hir neweikin sip newet God kerek naanmipri, hir natip netawin mit ensel ne wit ke God. Te ensel kerek ninin mit in hir ap niriak menmen mar im au. ⁹Nipaa Maikel hirak mitik ensel iuwe kinin, hirak ketike Seten tatipakit tenehakit keimin kakit yink ke Moses hirak kaa. Maikel kertei hirak ap yaaik te hirak kene Seten kesiuwe him enum au. Hirak kerekek katip kar ik: “Mitik Iuwe God kaknit me him mit enum.” ¹⁰Te mit enun nau netikewi nekre winak yi yewenipi niuk me God yekrerek, hir natip enum me menmen hir nepitariyem. Me menmen hir nerteiyem nisesim nar ke miyak hir neke yaank nises han kir niriakem, menmen im hir mit niriakem nisesim hiram mamiwaanki. ¹¹Hir naniwaank hiras. Hir nises menmen enum mitik Ken nipaa kiriakem, hirak han tewenin God o mit au. Mit in neweikin han kir nises menmen enum nipaa mitik Belam kisesim kempin mit ne Isrel keriuwerem te hir nises menmen enum. Hirak kiriak menmen ik kentar hirak hanhan kakit pewek. Hir naniwaank hiras nentar hir niriak enum nar ke nipaa Kora kiriakem me wi hirak kare kakikreher ke mitik Moses, hirak katip kakininek te God au kakip kaa. ¹²Mit in nemipin hir nire nan misawin mekre wan te sip mamnen mamnep nan te hiram mamwep. Mit nar ik netikewi yaam menmen me han tewenin nipaa Krai kaa, hir ap nineini yi yaineri au. Hir naanmipre hiras keriyen. Hir nises him ham him ham hir nar ke napi hawi kewik au te nime metitiwek meriuwetek kakno. Mit hir enun ap nankaap mit nar ke nu mari nikim au me wi maain mit nertei hiram mamri. Hir mit nire nu epei kaa, mit han niwaai hine newepuk mirak nentar hiram ap mari mekepi au. ¹³Mit in nemipin hir nire mani sir iuwe. Menmen enum hir niriakem hiram mire tiwerpek me mani sir mit nirem. Mit hir neweikin sip newet him yaaim me God te hir nire hir mau nepni minaiwir kerek epei mewiyen, hiram menep men han han.

⁸ 1:7 Jen 19:1-25; 2Pi 2:6, 10 ^h 1:8 2Pi 2:10 ⁱ 1:9 Dan 10:13, 21, 12:1; Rev 12:7; 2Pi 2:11; Sek 3:2 ^j 1:10 2Pi 2:12 ^k 1:11 Jen 4:3-8; 1Jo 3:12; 2Pi 2:15; Nam 31:16; Nam 16:1-35
^l 1:12 2Pi 2:13, 17; Esi 34:8 ^m 1:13 Ais 57:20; 2Pi 2:17

God kehimitan wit kire wit toto enum ke mit in te hir enu enit tipmain tipmain enum eik.

God kakrekyor enum me menmen enum hir mit nisesim

¹⁴ Nipaa enum eik mitik niuk mirak Inok hirak Adam nepenyek kirak, hirak kewis him mau tiwei katip kar ik: “Yi eiyimtwem. Mitik luwe kaknen kaktike mit nirak yaain ensel, ¹⁵ hir naninen skelim mit nanwepyapir menmen enum hir niriakem nanwepyapir him enum nipaa hir netpim men God.” ¹⁶ Mit in nemipin hir netpepan nemipinan han enuk neriuwe menmen epei man. Hir nises han kir keriyen. Hir natip him iuwe newenipi hiras natip hir yaain, hir nemitetpin nanri han ke mit han te hir enit menmen mir hir hanhanem.

Yi han tokik eiyu eiyises him yaaim me God

¹⁷ Te yi mit au. Yi wen han ekitet menmen nipaa mit aposel kerek Jisas Kraiss kehimiteni hir newepyapir him mirak haiu epei metpi hiram mamnen. ¹⁸ Hir netpi wi maain menep Jisas pike kaknen, mit han naninwesis nanitetnaan mit kerek hir nises him me God, hir nanises han kir enuk. ¹⁹ Mit in keriyen hir nanwep haiu mit miyapir ne weiwik me God maminke hasinau. Hir nanises menmen mit ne ti hir hanhanem. God Himin Yaaik kaku han kir au. ²⁰ Te yi nai yinan yi eikaapan hiras eiyises him yaaim iuwe me God in ek yi yisesim. Yi yitehi God menmen, yi yewis God Himin Yaaik kirak kakikepi. ²¹ Yi eiyises God werak werak te hirak kakteikni hirak han tewenini. Yi yemerir wi maain Mitik luwe kiau Jisas Kraiss pike kaknen kakrekyi yaaim te yi yayu yaitikerek tipmain tipmain enum eik. ²² Yi han tewein yikaap mit kerek nises God te mit han nari han kir nanises menmen enum. ²³ Yi yekepi yari mit han kir te hir enaaiwir menmen enum eiyir ke mitik hirak kekin menmen yaaim minatin mekre si waswas. Mit han yi han tewenini yekepi yari han kir te hir enaaiwir menmen enum, yi naanempre hiras te menmen enum hir nisesim ap te mamri han ki yi eiyisesim au emit!

Jut kewenipi niuk me God

²⁴ Hi hanhan God hirak luwe te kakikepi yi ap eiyises menmen enum, hirak iuwe te kakwisi yi han yaaik prar prar einen eiyirp ninaan mirak me wi hirak skelim mit te yi yink enuk eiyu au. Yi han yaaik iuwe eiyu. ²⁵ Hi hanhan haiu mewenipi niuk me God hirak kiutip kerekkek epei kekepai ketaihis keriuwe menmen yaaim nipaa Mitik luwe kiau

ⁿ 1:14 Jen 5:21-24; Diu 33:2; Mt 25:31 ^o 1:16 2Pi 2:10, 18 ^p 1:17 2Pi 3:2 ^q 1:18 2Pi 3:3
^r 1:19 1Ko 2:14 ^s 1:20 Kl 2:7; 1Te 5:11 ^t 1:23 Emo 4:11; Sek 3:2; Rev 3:4 ^u 1:24 Fl 1:10;
 2Pi 3:14; 1Te 5:23 ^v 1:25 Ro 16:27; 2Pi 3:18

Jisas Krai kerekueyem. Hi hanhan hirak kakre Mitik Iuwe kaku, hirak naanmipre menmen, hirak yaaik kinin menmen yapirwe, niuk mirak iuwe. Nipaa enum eik hirak kepu karik. Nipaa ein ere in ek ere maain tipmain tipmain enum eik, hirak kakpau kakpar ik.

Mepir keremem